

## Sobri Prujétu

Pesual di *Urban Design* di BPDA sa ta lansa un nóvu vizon di *design* pa sidadi interu pa apoia un spasu públiku ki ta spresa diversidadi di zónas di Boston, nun sforsu pa kria un sentiméntu di pertense na meu di kresiméntu di Sidadi. *Design* di spasu públiku sima el é vividu pode ser pesualmenti y kulturalmenti inpurtanti. Lidera un vizon di *design* pode djuda konstrui un ambienti ki ta prumove nos kapasidadi di tistimunha y xinti diferénsa komu un meu pa konstrui un kumunidadi saudável y dimokrasia. Es vizon ta ben difende puder transformador di kumunidades sustentável, kaminhável y solidáriu pa tudu algen, ki ta apoia saúdi susial, mental y fíziku enkuantu el ta midjora riziliénsia, présus asesível y ekuidadi. Através d'es prusésu, nu ta spéra ko-kria un vizon di *design* ku kumunidades di Boston pa artikula un vizon sentradu na pesoas ki ta ben orienta módi ki spasus y karakteristikas fíziku ta apoia y ta rifleti Boston.

## Finalidadi di Konsehu Konsultivu Kumunitáriu (sigla inglês: CAB)

Ménbrus di Konsehu Konsultivu Kumunitáriu (CAB) ta konsideradu parserus fundamental na formason di un prusésu di planiaméntu y *design* inkluzivu. En kulaborason ku CAB, nu ta spéra kria un planu ki ta riprizenta valoris y objetivus ki kumunidadi ta apoia y ki pode ser lebadu pa frenti pa implimentason di eterojeneidadi (apoiu pa diversidadi y diferéncias), na tudu zóna.

Pa apoia es prusésu más midjor y riprizenta kumunidadi, nu sa ta buska partisipason ativu di ménbrus di kumunidadi ki ta rifleti variedadi di orijens, interesis, spiriéncias vividu y kunhisiméntus spisializadu ki nu ta atxa na Sidadi di Boston. **Tudu kandidatura é benvindu. Nu ta insentiva prinsipalmenti kandidaturas di pesoas ki nunca partisipa na prusésus di planiaméntu, má tanbe nu ta apoia kes algen ki dja kustuma partisipa ô ki sta atualmenti ta partisipa na grupus konsultivu pa otus planu di Sidadi.**

## Métas di CAB

CAB ta ben kulabora ku ekipa di prujétu pa apoia formason di abordajens pa involviméntu ku kumunidadi y dizenvolviméntu di implimentason di *Boston Design Vision* (Vizon di *Design* pa Boston). Ménbrus di CAB ta ben sirbi di kaxa di resonánsia pa ideias y rikumendasons priliminar pa djuda midjora abordajens di Kámara Munisipal y di ekipa di konsultoris antis di involviméntu y divulgason na kumunidadi. Métas di involviméntu di ménbrus di CAB ta inklui, entri otus:

- Ménbrus ta ben djuda ko-kria un stratéjia di involviméntu ifikás, inkluzivu y abranjenti di siginti manera:
  - Identifika bareras a kumentárius di públiku
  - Molda dizenvolviméntu di matiriais di komunikason y transmison di mensajens sobri inisiativa pa kumunidadi en jeral
  - Sirbi di enbaxadoris di Vizon di *Design* pa Boston déntu di kumunidadi en jeral

- Djuda dizenvolve y mante transparénsia sobri prusésu di planiaméntu déntu di kumunidadi en jeral
- Djuda onra trabadjus ki fazedu na pasadu y investiméntus di ténpu di pesoas, indikandu duplikason di sforsu di planus antirior y en andaméntu, distakandu kumentáriu di planus antirior ki pode sirbi di bazi pa es nóvu prujétu
- Ménbrus ta ben djuda enrikise dizenvolviméntu y implimentason di vizon di *design*, di siginti manera:
  - Ofere se un perspetiva di spiriénsia vividu y kunhisiméntu pesual rilasionadu ku identidadi sosial y kultural di Boston.
  - Garanti ma prioridadi di kumunidadi ta ser rifletidu duranti prusésu interu
  - Molda y djuda midjora prusésu, ku objetivu di riprizona diferentis perspetiva na kumunidadi di Boston
  - Leba kunhisiméntu di prusésu di planiaméntu alén di dukuméntu di planu, pa apoia rializason di objetivus duranti implimentason na futuro.

## Papel y Responsabilidadi

Papel y risponsabilidadi izatu pode muda di akordu ku konpuzison izatu di CAB. Dibaxu nu ta aprizenta risponsabilidadi jeral di ménbrus di CAB.

### Ménbrus di CAB

- Partisipason na 3-4 seson y atividadi di involviméntu más abranjenti
- Partisipason ativu y signifikativu na 5 riunion di Konsehu Konsultivu Kumunitáriu
- Sirbi di enbaxador kumunitáriu di prusésu fóra di sesons di trabadju
- Riprizenta interesis y perspetivas diferenti di Boston y/ô di bu zóna en spisífiku
- Dividi rikursus ku otus ménbru di kumunidadi en rispósta a perguntas y pididus ki ta surji di un involviméntu más jeneralizadu permanentiméntu (konfórmi nisisáriu)
- Intende y djuda komunika alkansi, fóku y pusíveis rizultadu di prusésu
- Trabadju limitadu fóra di sesons di trabadju (izénplu: rivizon di matiriais, buska di informason, prumuson di stratéjias di involviméntu más abranjenti)

### Konpromisu di Ténpu y Térnu di Sirvisu di CAB

- Partisipason na CAB ta inklui un rimunerason fiksi
- Ménbrus ta kontinua ativu duranti prusésu di planiaméntu interu, y trabadju sta privistu pa kumesa na fin di Abril y kontinua ti Outonu di 2023
- Ta ben ten sinku riunion di CAB duranti prusésu interu, kada un ku durason di serka di 2 óra. Riunions ta markadu en parseria ku ménbrus pa pirmiti partisipason total di tudu ménbru na kes sinku riunion.

- Konprumisu di ténpu sta privistu pa ser di 20 a 30 óra, distribuídu entri riunions di CAB y otus atividadi di involviméntu na kumunidadi rilasionadu ku prujétu